

Rapport da gestiun 2021 dil president dalla pleiv catolica romana s. Martin, Trun

Preziau sur Tomasz
Preziadas parochianas, preziai parochians

En miu rapport sco president dalla baselgia catolica romana s. Martin da nossa vischnaunca dundel a vos las informaziuns necessarias davart il passau en nies cumin-baselgia durant igl onn d'uffeci vargau.

1. General

Era egl onn 2021 ha la pandemia Covid-19 dictau da bia da nossas activitads. Tuttina havein nus saviu organisar las fiastas dalla Creisma, dall'emprema s. Communiun ed era aunc autras activitads sco p.ex. processziuns cun offerir suenter in apéro ni il di da suppa. Tut quei ha saviu succeder mo cun controllas dil certificat e la presenza limitada da parochianas e parochians durant ils survetschs divins. Quellas controllas ein vegnidas fatgas egl onn 2021 dals commembers dalla suprastanza sco era dals commembers dil cussegl pastoral. Plinavon havein nus saviu activar danovamein las ministrantas ed ils ministrants. Sur Tomasz, la catacheta Isabelle, la calustra Gabriela e siu um Georg han organisau ina sentupada cun entgens posts per ils ministrants/as en baselgia. Denter auter han els saviu ir sin clutger ni empruvar ora l'orgla. Silsuenter ha ei aunc dau ina buna tscheina ell' uustria Centro. Al di da suppa han biabein 50 personas priu part ed igl ei vegniu rimnau daners per la renovaziun dalla baselgia da Nossadunna dalla glisch. Isabelle Defuns ha lu saviu surdar ina biala summa da 1755.- fr. Bien engraziament. Las duas sontgas messas da Nadal havein nus festivau a Trun. Allas 17:00 la s. messa per famiglias ch'ei vegnida embellida cun il cant da varga 30 affons e la secunda allas 22:00 ch'ei vegnida embellida dil chor da baselgia. Era sche la pandemia era omnipresenta egl onn 2021 ei bein enqual acziun reussida ed aschia essan nus puspei vegni pass per pass pli datier alla normalitad.

Renovaziun dalla baselgia da Nossadunna dalla Glisch:

Il project ei quintaus cun 730'000.- sfr. senza il plaz avon baselgia e la via tochen si tier il parcadi, quei appartegn per la pli gronda part alla vischnaunca.

La finanziaziun vesa ora sco suandont:

Tgira da monuments dil cantun grischun	106'000.00
Tgira da monuments dalla confederaziun	106'000.00
Baselgia catolica grischuna	200'000.00
Privats, pleivs, marcaus, vischnauncas e fundaziuns	205'000.00
Total	617'000.00

Il davos d'avrel 2022 manca la summa da biabein **113'000** sfr.

Pervia dalla pandemia e l'uiara ell' Ucraina dat ei per part problems da survegnir il material da baghegiar. Perquei havein nus decidu d'exequir gl'onn 2022 mo las lavurs dil fundament e sanar ils mirs. L'auter onn vegnan allura las ulteriuras lavurs vid la baselgia fatgas.

Per anflar daners per la baselgia da Nossadunna ha ei duvrau bia engaschi. Seigi quei d'anflar las dretgas adressas per tarmetter las brevs, crear ina pagiena d'internet, crear in flyer per tarmetter allas casadas en Surselva ni era tarmetter mintgamai ina brev d'engraziament suenter ch' enzatgi ha susteniu la renovaziun. Cun gronda premura ed engaschi ha Gabriela Vincenz fatg ina gronda part da quellas lavurs. Jeu less engraziar zun fetg ad ella persunter.

a) Suprastonza

La collaboraziun denter la suprastonza ha funcziunau per mia cumpleina cuntentienscha. El temps dalla pandemia ei il basegns da vegnir informaus staus immens gronds. Quei pensum ha per la gronda part nies plevon Sur Tomasz Piotr Drwal surpriu ensemen cun nossa actura Olivia Pfister. En quater sedutas ei la suprastonza seradunada ed ha liquidau ils pensums adossai ad ella. Pensums delegai ad in ni l'auter per liquidaziun (art. 24 dalla constituziun) ha il responsabel sligiau e sch'igl ei stau necessari ha la suprastonza sancziunau quella decisiun. La collaboraziun cun il cussegl pastoral cun sia presidenta Isabel Defuns-Gamboni iniziativa ha funcziunau grondius.

b) La pastoraziun

Grazia agl engaschi da nies zun preziau plevon sur Tomasz Piotr, mo era cun gl'agid da tut ils auters gremis dallas pleivs e dalla caplania, en special la gronda lavur dil secretariat, dil cussegl pastoral e dalla catecheta ha la pastoraziun funcziunau era en quei onn per cumpleina cuntentienscha.

c) Instrucziun religiusa

Sin la fin digl onn da scola 2021/2022 va nies catechet Hubert Venzin en pensiu. Per siu grond engaschi per nos affons lessel engraziar ad el da tut cor e giavischar ad el buna sanadad e tut bien per siu futur. Cun Rilana Cadruvi-Scherrer havein nus anflau ina fetg capavla catecheta che surpren il pensum da Hubert Venzin.

d) Veta e mort

Mintgin ha siu agen pensum cheu sin tiara e quel entscheiva cun la naschientscha e finescha cul viadi en la perpetnada. Veta e mort stattan datier in da l'auter. Duront il davos onn havein nus stuiu prender cumiau da caras concristianas e concristians, Denton havein nus era saviu selegrar ensemen cun ils geniturs da novs battegiat.

Davos la statistica stattan muments grevs mo era uras legrevilas.

Battens	8 a Trun e 3 a Schlans
Premcommunicants	2 affons
Creisma	12 affons
Nozzas	3 a Trun
Extrada ord la baselgia	2 a Trun
Mortoris	17 a Trun ed 1 a Schlans

A tuttas defunctas e defuncts engraziel per il bien che nus havein astgau retscheiver dad els. Allas famiglias en malencurada exprimn nus nossa pli sincera condolientscha.

2. Engaschis en la pleiv

Enteifer la communitad crisitiana sin territori da nossa vischnaunca havein nus ina liunga roscha da fideivlas collaboraturas e collaboraturs e quei duront pli liung temps ora. Nus havein in cussegl pastoral zun activ, ugaus capluttas fideivels e cunscienzius ed ina massa autras persunas che fan el zuppau ina gronda lavur ch'ins vesa in summa buca. Menziunar lessel era il cussegl pastoral, sco era la lavur dallas calustras e calusters, dils ugaus capluttas e dils organists. Medemamein lessel punctuar la lavur da biars che vegn prestada voluntariamein duront igl onn ora.

Allas persunas engaschadas lessel far in compliment per tut lur engaschi per il beinstar da nossa baselgia: Lecturas, catecheta e catechets, l'organisaziun entuorn mintga sepultura, ils organists, ils chors, ils dirigents dil chors, l'uniun da mummas e dunnas, l'uniun da giuventegna cun ornar l'intrada alla baselgia cun tshuppi e fluras, la musica instrumentala per embellir las fiastas e secapescha era tuttas persunas ch'orneschan e schubregian las baselgias.

En special lessel menziunar igl engaschi da dunna **Rilana Cadruvi-Scherrer**. Ensemen cun siu um **Clau Scherrer** e nossa catecheta **Isabelle Defuns** organiseschan els adina puspei specialas messas cun cant d' affons en connex cun occasiuns specialas nua ch'ils affons stattan el center dil survetsch divin. Era all'uniun da mummas e dunnas engraziel per tut lur engaschi. Ellas organiseschan il solver per ils affons

sunter las messas da scola, han quita dalla vestgadira dils premcommunicants ed il bi usit dils retgs sco era per il lavar ora tut ils sanctuaris. Senza gl'engaschi dallas mummas e dunnas fuss quei tut buca pusseivel! Era a nossas uguas e nos uguas caplutta auda in special engraziament. Els preparan mintgmai las capluttas per il survetg divin e han quita dalla facultad da mintga caplutta. Cunquei che nus havein negin ugau per la caplutta Nossadunna dalla neiv a Schlans, procura dunna **Renata Pfister-Maissen** voluntariamein gl'usitau quita dalla caplutta.

Buca emblidar d'engraziar lessel per las activitats entuorn las processions e sepulturas, A **Giusep ed Isabelle Defuns** per il riug da sepultura, allas **giuvnas** per il purtar la Nossadunna mintgmai da perdanonza sco era tut quels che **portan ils cafanuns** tier mintga fiasta. Alla **suprastonza communal** auda in cordial engraziament per purtar mintga fiasta ecclesiastica il balduchin. Aschia vegnan fiastas embellidas e la veta da cuminonza viva.

A gl'entir **cussegl pastoral**, cun la presidenta engaschada **Isabelle Defuns**, actuara e las menadras ditgel in sincer engraziel fetg per lur bien sustegn da nies plevon. Nus havein in cussegl pastoral che s'engascha cun tutta premura per il beinstar da nossa cuminonza.

3. Petgas da nossa cardientscha

a) Ductrina

Ella scola da Trun vegn dau ductrina en tuttas classas e cheutras tschentau in bien fundament religius per ils affons. L'instrucziun religiusa ei vegnida dada: emprema tochen quarta classa dalla premurada catecheta **Isabelle Defuns-Gamboni**. Ella s'engascha era fetg cun ils affons per ils survetschs divins per famiglias. La 5. e 6. classa vegn instruida da **Hubert Venzin** che prepara medemamein l'instrucziun dalla s. Creisma. Il scalem ault vegn instruius da **Stefan M. Bolli**.

b) Fatgs da baselgia

Tuts ils fatgs da baselgia figureschan el rapport dalla presidenta dil cussegl pastoral.

c) Manteniment dils beins

Per il mantegniment usitau dils baghetgs sacralis sco era en connex cun las casas pervendas vegn igl administratur Benedetg Albin a dar plaid e fatg.

3. Persunal

a) Lecturas e parter ora la s. Communiun

Allas lecturas: **Annamaria Cavigelli-Tschuor, Gabi Cajacob-Mirer, Isabelle Defuns-Gamboni, Esther Tomaschett-Monn e Manuela Wolf-Tomaschett** per Trun, **Marta Bundi-Giger, Josefa Wolf-Tomaschett, Anita Orlik-Vincenz e Letizia Rensch-Tomaschett** per Zignau, engraziel cordialmein per lur buns survetschs ch'ellas fan dumengia per dumengia.

En special lessel era seregurdar da nossa lectura fidada Daniela Vincenz che ha stuiu prender bia memia baul cumiau dalla veta terrestre. Sincera condolientscha a siu mariu Claudio Vincenz ed ils auters parents.

b) Organists

Entras la pandemia havein nus era buca astgau cantar en baselgia aschia che la musica dall'orgla ei stada en quei temps aunc bia pli impurtonta per nus. Perquei lessel engraziari zun fetg a nos organists **Clau Scherrer** e **Jacinta Jacomet-Lombriser**.

Ei ha dau in pèr paucas dumengias nua che nus havein giu negin accumpignament da l'orgla. Per quella situaziun supplichein nus vus da haver capientscha.

Tier sepulturas ha Marcel Pöhl da Rabiis segidau in pèr gadas. Igl ei tuttavia buca sempel d'anflar mintgamai in organist per sepulturas.

A **Claudio Vincenz** engraziein nus cordialmein per la prontadad d'embellir dumengia per dumengia las s. messas cun musica sacrala en la baselgia da Zignau.

b) *CalustrAs*

Special engraziament admittel allas calustras ed als calusters: **Gabi Cajacob-Mirer** per la baselgia parochiala, **Letizia Rensch-Tomaschett** per la baselgia da Zignau, **Georgina Flepp-Cahannes** per la baselgia da Schlans sco era **Tarcisi Guldemann** per Nossadunna dalla Glisch. Era lessel engraziar a **Georg Cajacob** per sia prontadad da segidar en cass specials. Senza lur gronda lavur el zuppau funcziunass nies sistem buca. Ei vegn prestau bia e buna lavur nunveseivla, mo pauc da lur lavur ei enconuschenta allas parochianas e parochians.

4. Renconuschientscha ed engraziament

Tgei fuss ina cuminonza senza la lavur da biars funcziunariAs. Quella cuminonza essas vus che separticeps alla veta religiusa en nossa pleiv e caplania cun assister allas s. messas ni ad autras puschidas. Persuenter lessel admetter il duiv engraziament, sperond che nossa cuminonza resti activa era el temps da desinteress per la religiun, sco era per nossa Baselia catolica romana. Nies zun premurau plevon, sur Tomasz vegn sustenius digl cussegl pastoral engaschau e la catecheta iniziativa Isabelle Defuns-Gamboni che fa cun lur team in bien fundament, sin il qual nus savein baghegiar si nossas activitads cristianas.

In sincer e profund engraziament ei il minimum ch'jeu sai admetter a mes consuprastonts sco era alla revisura **Lea Alig-Flury** ed al revisur **Gion Friberg**.

En il rapport hai jeu menziunau plirs engraziaments. Jeu sperel ch'jeu hagi embridau negin. Sche quei ei tuttina il cass, lessel sperstgisar tier quellas personas ed engraziar en quei mument era a lezzas.

Sco finiziun lessel engraziar a vus, preziadas parochianas e parochians, che segideis adina puspei sin ina u l'otra moda morala ni finanziaria per il beinstar da nossa pleiv ni documenteis, entras vossa preschientscha, dumengia per dumengia vies interess per ils fatgs da nossa religiun.

Sco cuminonza sa la veta da pleiv mo exister cun il sustegn da bia mauns e sur da quels disponin nus aunc il mument. Per tut quei agid e sustegn seigi engraziou da tut cor.

Trun, matg 2022

Pieder Decurtins, president